

आकाशवाणी

खबरां :-

1. केन्द्री खजाना मंत्री निर्मला सीतारमण होरें आखेआ ऐ जे केन्द्र सरकार, टैक्स प्रणाली गी सखल्ला बनाने लेई कम्म करा'रदी ऐ। उ'नें आखेआ जे औदन टैक्स गी हुन इक गुंजलदार प्रक्रिया दे तौर पर नेई दिक्खेआ जाहगा।
2. सरकारै, ब्हाई कंपनी इंडिगो गी निर्देश दिता ऐ जे ओह प्रभावत होई दिएं डुआरिएं दिएं टिकटें दे पैसे जात्तरिएं गी बिजन चिर लाए दे वापस करै।
3. राष्ट्रपति, उपराष्ट्रपति ते प्रधानमंत्री होरें भारत रत्न डाक्टर बी.आर. अम्बेडकर हुंदे 70में महापरिनिर्वाण दिवस दे मौके पर उ'नेंगी श्रद्धांजलि देने च अज्ज राष्ट्र दी अगुवाई कीती।
4. भारत, जपान, अस्ट्रेलिया ते अमरीका ने बन्ने पारा आहले आतंकवाद सने हर चाल्ली दे आतंकवाद दी सख्त ते इक-सुरै च निदेआ करदे होई दिल्ली दे लाल किले कश होई दी आतंकवादी घटना पर दुक्ख ते बसोस बुज्जेआ ऐ।
5. चुनांऽ आयोग ने आखेआ ऐ जे मतदाता सूचिएं दी बशेश नजरसानी आहली प्रक्रिया दे दुए गेड दरान हुने तगर मतदाता सूची च नांऽ दर्ज कराने आहले 50 करोड 93 लक्ख शा मते फार्म बंडी दिते गेदे न।

<><><><><><>

Finance Minister

खजाना मंत्री निर्मला सीतारमण होरें आखेया ऐ जे केन्द्र सरकार टैक्स प्रणाली गी सखल्ला बनाने लेई कम्म करा रदी ऐ ते औदन टैक्स आली प्रक्रिया गी हुन कोई गुंजलदार प्रक्रिया दे तौर पर नेई दिक्खेया जाना लोडचदा ऐ। अज्ज नमीं दिल्ली च इक निजी मीडिया संगठन कार्यक्रम गी सम्बोधित करदे होई सीतारमण होरें आखेया जे बसनीकें दे स्तर गी उबडा चुक्कने लेई औदन टैक्स आली स्लैबें गी होर मता पारदर्शी ते सौक्खा बनाया जाना लोडचदा ऐ। मंत्री होरें आखेया जे कस्टम सरबन्धी ढांचे दा बड्डे स्तर पर कायाकल्प करना उंदी अगली बड्डी जिम्मेदारी ऐ। उनें आखेया जे सरकारै पिच्छले दंड बरें दे दरान कस्टम ड्यूटियें च बल्लें-बल्लें बडी कटौती कीती ऐ ते कस्टम सरबन्धी प्रणाली गी सौक्खा बनाने दे जतन लगातार कीते जा रदे न।

<><><><><><>

Govt. Indigo

शैहरी हवाबाजी सरबन्धी मंत्रालय नै ब्हाई कम्पनी इंडिगो गी निर्देश दिता ऐ जे ओह बिजन चिर लाए दे सब्भनें यात्रियें दे टिकटें दे पैसे वापस करी देऐ। मंत्रालय नै हुकमरसाल करदे होई आखेया ऐ जे इंडिगो दियें रद्द कीती गेदी जां प्रभावत होई दियें डुआरियें लेई टिकटें दे पैसे वापस करने दी प्रक्रिया गी कल रातीं 8 बजे तगर हर हाल च सबूरा करी लैता जाना लोडचदा ऐ। इंडिगो गी इब्बी निर्देश दिता गया ऐ जे ओह ओकडे यात्रियें पर कोई बाददू शुल्क बी नेई लाए- जिंदियां यात्राएं सरबन्धी योजनां- डुआरियां रद्द होने करी प्रभावत होइयां न। मंत्रालय नै इब्बी साफ करी दिता ऐ जे यात्रियें दे टिकटें दे पैसे वापस करने दी प्रक्रिया च कुसै किस्मा दा कोई चिर जां ढिल्ल-मट्ट बर्दाश्त नेई कीती जाहग ते ऐसा होने पर इंडिगो कम्पनी खलाफ कारवाई कीती जाहगा।

<><><><><><>

Delhi Airport

दिल्ली ब्हाई अड्डे पर डुआरिएं दा संचालन परतियै सामान्य होआ करदा ऐ। ब्हाई अपें सरबन्धी भारती प्राधिकरण ने दस्सेआ ऐ जे इंडिगो दिआं किश डुआरियां अजे प्रभावत रौहडन। उ'नें यात्रियें गी असुविधा थमां बचने लेई ब्हाई अड्डे गितै खाना होने शा पैहले एयरलाइन थमां डुआरी बारै ताजा जानकारी लैने दी सलाह दित्ती ऐ। प्राधिकरण इस दिशा च रुकावटें गी घट्ट करने ते यात्रियें लेई सुगम यात्रा जकीनी बनाने आस्तै सबनें हितधारें कन्नै तालमेल करा'रदा ऐ। लोकें गी उ'दी डुआरी दे बारै च ताजा जानकारी हासल करने लेई अधिकारिक वेबसाइट www.newdelhiaairport.in दिक्खने दी सलाह दित्ती गेई ऐ।

<><><><><><>

Amit Shah

केन्द्रीय गृहमंत्री ते सहकारिता मंत्री अमित शाह होरें आखेया ऐ जे सरकार-डेयरी खेतर च सर्कुलर अर्थबवस्था आला मॉडल लागू करियै अगले 5एं बरे दे दरान पशु-पालकें दी औंदन च 20 फीसद तगर दा बाद्दा करने दे लक्ष्य गी लेइयै अगड़ी बधा करदी ऐ। मंत्री होरें एह ऐलान गुजरात दे सनादर च इक जनसभा गी सम्बोधित करदे होई कीता। एहदे शा पैहले उने बनास डेयरी दे Bio CNG ते हैलें सरबंधी प्लांट दा उदघाटन कीता । बनास डेयरी आसेया सर्कुलर अर्थबवस्था दी कामयाब अमलावरी पर लौ पांदे होई श्री शाह होरें आखेया जे सरकार भारत च सब्बनें डेयरियें च इयै मॉडल लागू करने दी मंशा रखदी ऐ।

<><><><><><>

Supreme Court- AI

सर्वोच्च अदालतै इस गल्लै दा जकीन दोआया ऐ जे न्यायिक प्रक्रिया च Artificial Intelligende दे इस्तेमाल दे मामले च न्यायधीश बड़ी मती सतर्कता बरता करदे ना। अदालतै इब्बी आखेया ऐ जे इस किस्मै दी तकनीक कदें बी न्यायिक फैसलें लैने दी प्रक्रिया दा आधार नेंई बनी सकदी। भारत दे प्रधान न्यायधीश सूर्यकांत हुंदी अगुआई आली दंड जजें दी पीठ- न्यायिक प्रणाली च Artificial Intelligence ते Machine Learning दे नियमन दी मंग आली याचिका पर सुनवाई करा रदी ही। प्रधान न्याधीश सूर्यकांत होरें एह साफ कीता जे न्यायपालिका-तकनीकें दे मामले च बड़ी सतर्क ऐ। उनें इस गल्लै पर जोर दिता जे AI गी कदें बी न्यायिक फैसले लैने दी प्रक्रिया पर हावी नेंई होन दिता जाहगा।

<><><><><><>

Ambedkar Mahaparinirbaan Divas

समूलचा राष्ट्र अज्ज भारत रत्न डॉ. बी.आर अम्बेडकर होरें गी उं'दी 70मीं बरसी पर श्रद्धांजलि अर्पित करा'रदा ऐ। इस सरबंधै च अज्ज मुख् भरै च केई कार्यक्रमें दा आयोजन कीता गेआ, जिंदे च डॉ. अम्बेडकर हुंदे राष्ट्र लेई बेजोड योगदान पर लोऽ पाई गेई। राष्ट्रपति द्रौपदी मुर्मु, उप- राष्ट्रपति सी.पी राधाकृष्णन, प्रधानमंत्री नरेंद्र मोदी, लोसभा स्पीकर ओम बिरला ते होर दुए नेताएं बी अज्ज संसद भवन परिसर च डॉ. अम्बेडकर होरें'गी पुशपांजलि अर्पित कीती।

<><><><><><>

B. R Ambedkar

समाजी न्याऽ ते अधिकारिता मंत्रालय दे तैह्त् डॉक्टर आंबेडकर फाउंडेशन आसेआ हर ब'रे महापरिनिर्वाण दिवस मनाया जंदा ऐ। एहदे च भारत रत्न डॉ. बी आर आंबेडकर होरें'गी श्रद्धांजलि अर्पित कीती जंदी ऐ। महा-परिनिर्वाण बौद्ध परंपराएं च दस्सी गेदी इक अवधारणा ऐ जेह्दे जन्म ते पुर्नजन्म दे चक्र थमां आत्मा दी पूरी चाल्ली मुक्ति गी दर्शादा ऐ। बाबा साहेब आंबेडकर भारती संविधान दे मुख् वास्तुकार हे जिं'दे समाजी न्याऽ, बरोबरी ते लोकतंत्र बारै बचार अज्ज बी पीढियें गी प्रेरित करदे ना। उपराष्ट्रपति सी.पी. राधाकृष्णन होरें सोशल मीडिया पोस्ट च आखेआ ऐ जे बरोबरी, सम्मान ते भाईचारे लेई डॉ. आम्बेडकर हुं'दे अनथक संघर्ष ने इक आधुनिक, प्रगतिशील ते समावेशी भारत दी नींह रक्खी। प्रधानमंत्री नरेन्द्र मोदी होरें सोशल मीडिया पोस्ट च आखेआ जे डॉ. आम्बेडकर होरें पीढियें गी मनुक्खी गरिमा गी बनाई रक्खने ते लोकतंत्र दी नींह गी मजबूत करने लेई प्रेरित कीता। गृह मंत्री अमित शाह होरें आखेआ ऐ जे डॉ. आम्बेडकर होरें मजूरें, करसानें ते समाज दे कमजोर वर्गें दे अधिकारें गी जकीनी बनाइयै समाजी न्याऽ दे सबनें शा उच्चे आदर्शें दी स्थापना कीती।

<><><><><><>

QUAD Nations

भारत, जपान, अस्ट्रेलिया ते अमरीका ने बन्ने पारा आह्ले आतंकवाद सने हर चाल्ली दे आतंकवाद दी सख्त ते इक-सुरै च निंदेआ करदे होई दिल्ली दे लाल किले कश होई दी आतंकवादी घटना पर दुक्ख ते बसोस बुझ्जेआ ऐ। क्वाड मुख् दे आतंकवाद-रोधी कार्यसमूह दी त्रीऽ बैठक जंदी 4 ते 5 तरीक की नमीं दिल्ली च, भारत, जपान, आस्ट्रेलिया ते अमरीका बश्कार लाई गेई। इस दरान क्वाड समूह दे सदस्य मुख् आतंकवादी खतरें पर चर्चा दे कन्नो-

कन्नौजी भारत-प्रशांत खित्ते च हाल दिएं घटनाएं पर बी बचार-बटांदरा कीता। क्वाड समूह दे सदस्य मुल्लें इस गल्लै गी जकीनी बनाने दे महत्व पर जोर दित्ता जे भारत-प्रशांत, सदा गै आतंकवादी खतरें थमां मुक्त बने दा रवै। इन्हें मुल्लें बक्ख-बक्ख मंचें पर आपसी सैह्योग गी होर बधाने दी अपनी वचनबद्धता गी बी पक्का कीता ऐ।

<><><><><><>

International Science Festival

विज्ञान ते प्रौद्योगिकी मंत्रालय आसेआ आयोजित 11मां भारत अंतर्राष्ट्री विज्ञान महोत्सव - आई.आई.एस.एफ. दा पैहला सत्र अज्ज पंचकूला दे दशहरा मैदान च शुरू होआ। विज्ञान ते प्रौद्योगिकी मंत्री डॉ. जितेंद्र सिंह होरें अज्ज एहदा औपचारिक उद्घाटन कीता। इस मौके पर डॉ. जितेंद्र सिंह होरें आखेआ जे हर बरें इस चाल्ली दे आयोजनं दा मकसद अज्जै दी युवा पीढ़ी गी शिक्षित करना ते विज्ञान दिएं उपलब्धियें दा जश्र मनाना ऐ। इस मौके पर अंतरिक्ष यात्री ग्रुप कैप्टन शुभांशु शुक्ला होरें विद्यार्थिं ते युवा वैज्ञानिकें दे कन्नै अपने अनुभव सांझे कीते। उन्हें आखेआ जे भारत च विज्ञान खेत्तर च बड़ी तरक्की होआ करदी ऐ जेहड़ी देशवासियें लेई बड़ी बड्डी प्रेरणा ऐ कीजे भारत विज्ञान दे खेत्तर च आत्मनिर्भर बना करदा ऐ। उन्हें अंतरिक्ष च भारत आसेआ कीते गेदे उपाएं पर बी अपने बचार सांझे कीते। इस बारी एकडे महोत्सव दा विशे-सार ऐ : विज्ञान थमां समृद्धि: आत्मनिर्भर भारत लेई ऐ। विज्ञान महोत्सव दा मकसद वैज्ञानिक नजरिये ते नमिं काहडें आहले रौंऽ गी बढावा देना ते युवाएं गी विज्ञान ते प्रौद्योगिकी दे खेत्तर च जोगदान देने लेई प्रेरित करना ऐ। इस विज्ञान महोत्सव च भारत दे बक्ख-बक्ख राज्यें थमां ज्हारां बद्धे विद्यार्थी, युवा शोधकर्ता ते विज्ञान प्रेमी हिस्सा लै करदे ना। एहदे अलावा, इसरो, डी.आर.डी.ओ ते होरनं प्रमुख वैज्ञानिक संस्थानें दे वरिष्ठ वैज्ञानिक ते शोधकर्ता बी एहदे च शामिल न, जेहडे बक्ख-बक्ख सत्रें ते गल्लबात आहले कार्यक्रमें च हिस्सा लैडन। महोत्सव च वैज्ञानिकें बश्कार गल्लबात आहले सत्र ते राष्ट्र दिएं जरूरतें मूजब बक्ख-बक्ख जनसंपर्क गतिविधियां बी आयोजित कीतीआं गेइयां ना।

<><><><><><>

Delhi AI Campaign

दिल्ली च कल भारत दे पैहले शहरें पर केंद्रित ए.आई अभियान दा उद्घाटन कीता जाह्ग। दिल्ली दे शिक्षा मंत्री आशीष सूद होरें इक सोशल मीडिया पोस्ट च इस कार्यक्रम दी जानकारी दिंदे होई दस्सेआ जे दिल्ली, नवाचार दे इक नमं जुग च गैह रक्खा करदी ऐ। सूद होरें आखेआ जे एह भारत दा पैहला शहरें बक्खी केंद्रित ए.आई अभियान ऐ जिसी विद्यार्थिं गी सशक्त बनाने, रचनात्मकता गी बढावा देने ते ए.आई-संचालित भविष्य लेई तैयार युवाएं दी इक मजबूत श्रृंखला बनाने लेई तैयार कीता गेआ ऐ।

<><><><><><>

India -Russia

भारत ते रूस ने बरें 2030 तगर दपक्खी कारोबार गी 100 अरब डॉलरें तगर बधाने दा धेइया पक्का कीता ऐ। नमीं दिल्ली च कल रूस दे राष्ट्रपति व्लादिमीर पुतिन हुंदे कन्नै भारत-रूस बपार मंच गी संबोधित करदे होई प्रधानमंत्री नरेन्द्र मोदी होरें एह गल्ल आखी। उन्हें गलाया जे दौनें नेताएं बश्कार होई दी चर्चा ते दौनें पक्खें दी मजबूत क्षमता एह सारत दिंदी ऐ जे दपक्खी बपार लक्ष्य, तय समें शा पैहले गै हासल करी लैता जाह्ग। इस मौके पर बोलदे होई प्रधानमंत्री नरेन्द्र मोदी होरें आखेआ जे उन्हें पुतिन हुंदे कन्नै मिलियै बरें 2030 तगर दपक्खी बपार गी 100 बिलियन डॉलरें दे पार पुजाने दा लक्ष्य तय कीता हा ते अज्ज दौनें मुख्य उस लक्ष्य गी तय समें शा पैहले हासल करी लैने दे मजबूत धेइये कन्नै अगडे बधा करदे ना। उन्हें आखेआ जे पिच्छले 11एं बरें दे दरान भारत च जिस रफ्तार ते पैमाने पर बदलाव कीते गे न, ओह ऐतिहासिक ना। रिफॉर्म, परफॉर्म ते ट्रांसफॉर्म, यानि सुधार, कारकरदगी ते बदलावें दे सिद्धांत पर अगगे बधदे होई भारत तेजिआ कन्नै दुनिया दी त्रीये नम्बरै दी सबनें शा बड्डी अर्थबवस्था बनने दी दिशा च अगडा बधा करदा ऐ। प्रधानमंत्री होरें आखेआ जे भारत ते यूरेशियन आर्थिक संघ बश्कार इक मुक्त बपार समझौते पर चर्चा शुरू होई गेई ऐ। उन्हें गलाया जे भारत ते रूस दे सरबंधें दी सबनें शा बड्डी ताकत इसै विश्वास च छप्पी दी ऐ। उन्हें आखेआ जे बपार-कारोबार होऐ जां कूटनीति, कुसै बी सांझ-भ्याली दी नींह आपसी विश्वास ऐ। उन्हें आखेआ जे भारत ते रूस दे सरबंधें दी सबनें शा बड्डी ताकत इयै

विश्वास ऐ ते इयै विश्वास दौनें मुखें दे सांझे जतनें गी दिशा ते रफ्तार बी दिंदा ऐ। प्रधानमंत्री होरें आखेआ जे शिखर सम्मेलन च भारत ते रूस ने दौनें मुखें दे बसनीकें लेई सैलानी वीजा पर केई महत्वपूर्ण फैसले लैते न, जेह्दे'नै दौनें मुखें च सैलसफा गी बढावा मिलग ते रोजगार ते कारोबार दे नमें मौके बी पैदा होडन। उ'नें आखेआ जे दौने मुख इलेक्ट्रिक गड्डिएं दे निर्माण, ऑटोमोटिव कलपुर्जे ते वायरलेस मोबिलिटी तकनीक च बी सांझ-भ्याली करी सकदे न।

<><><><><><>

EC SIR

भारती चुनांऽ आयोग ने आखेआ ऐ जे मतदाता सूचिएं दी बशेश नजरसानी आहली प्रक्रिया दे दुए गेड दरान हुनै तगर मतदाता सूची च नांऽ दर्ज कराने आहले 50 करोड़ 93 लख शा मते फार्म बंडी दित्ते गेदे न। इस चरण च शामिल कीते जाने आहले तकरीबन 51 करोड़ मतदाताएं चा 99 इशारिया 9-3 फीसद मतदाता एह्दे दायरे हेठ आहन्ने जाडन। आयोग ने आखेआ ऐ जे हुनै तगर तकरीबन 49 करोड़ फॉर्म दा डिजिटलीकरण करी दित्ता गेदा ऐ। 9वें राज्यें ते त्रै केन्द्र शासित प्रदेशें च जंदी 4 दिसंबर गी मतदाता सूचिएं दी बशेश नजरसानी आहली प्रक्रिया दे दुए चरण दी शुरुआत होई ही। इनें राज्यें ते केन्द्र शासित प्रदेशें च छत्तीसगढ़, गोवा, गुजरात, केरल, मध्य प्रदेश, राजस्थान, तमिलनाडु, उत्तर प्रदेश, पश्चिम बंगाल, अंडमान निकोबार टापु, पुद्दुचेरी ते लक्षद्वीप शामिल न। मतदाता सूचिएं दी बड्डे पैमाने पर नजरसानी अगले ब'रे 14 फरवरी गी अखीरली मतदाता सूची दे प्रकाशन दे कन्नै गै संपन्न होग।

<><><><><><>

PPC

विद्यार्थिएं उ'ंदे माता-पिता ते अध्यापकें कन्नै गल्लबात आहले प्रधानमंत्री नरेन्द्र मोदी हु'ंदे अनोखे कार्यक्रम “परीक्षा पे चर्चा” दे 9में संस्करण थमां पैहले माईगाँव पोर्टल पर इक राश्ट्रव्यापी प्रतियोगिता चला करदी ऐ। एह् मते विकल्पें आहली ऑनलाइन सोआलें पर आधारत प्रतियोगिता अगले ब'रे 11 जनवरी तगर चलगा। 6मीं थमां 12मीं जमात तगर दे बच्चे, उ'ंदे अध्यापक ते माता-पिता एह्दे च हिस्सा लेई सकदे न। इस गतिविधि गी पूरा करने आहले सबनें पंजीकृत प्रतिभागियें गी माईगाँव पोर्टल दी तरफा भागीदारी दा प्रमाण पत्र दित्ता जाह्ग। “परीक्षा पे चर्चा” जनवरी 2026 च आयोजित होनी ऐ, जित्थे देश-बदेश दे विद्यार्थी, उ'ंदे माता-पिता ते अध्यापक, प्रधानमंत्री हु'ंदे कन्नै म्तेहानें दे तनाऽ पर चर्चा करडन ते म्तेहानें गी इक उत्सव ते जीवन दा अननुदृ हिस्सा मन्नियै इ'दा जश्न मनाडन।

<><><><><><>

IMD

मौसम विभाग ने दिल्ली, पंजाब, हरियाणा, चंडीगढ़, उत्तर प्रदेश, पूर्वी राजस्थान, झारखंड ते ओडिशा दे किश इलाकें च सीतलहर चलने दे असार दस्से न। इस म्हीने दी 10 तरीक तोहड़ी देशै दे पूर्वोत्तर हिस्सें दे कन्नो-कन्नो हिमाचल प्रदेश ते ओडिशा च बी बड्डुलै दे बेल्ले घना कोहरा छाये दा रेई सकदा ऐ। कल्लै तोहड़ी अंडमान ते निकोबार टापुएं दिएं किश थाहें पर गरज-चमक दे कन्नै बरखा बरने ते अंधी-झक्खड झुलने दे बी असार न।

<><><><><><>